



Vedra medra co feitizo do Camiño

Os cursos de 3.º e 4.º de primaria percorren un treito da Vía da Prata

Sesenta alumnos e alumnas de educación primaria fixeron o 4 de maio o Camiño desde a parroquia de San Pedro de Vilanova ata Lestedo acompañados dos seus mestres.

Os camiñantes empezaron o percorrido na capela do Santiaghiño, na que repararon, así como na fonte e na lenda nela gravada. Alí puideron ler:

“ANO DE 1670. FVENTE DE SANT[IAG]O QUE HICIERON SVS DISCIPVLOS S. THEODORO I S: ATHANACIO. A ESTE MONTE LOS INBIO LA REINA LOBA A BVSCAR LOS BVEIES PARA LLEBAR SV SANTO CVERPO DE PADRÓN A DONDE OI ESTA. I LLEGADOS FATIGADOS A ESE LVGAR LES ACOMETIO VN FIERO DRAGON. HACIENDO LA SEÑAL DE LA + REBENTO I LOS TOROS BINIERON TRAS ELLOS COMO MANSOS CORDEROS. POR LO QVAL SE CONBIRTIO ELLA CON TODA SV FAMILIA. I PARA MEMORIA DESTO I ALIBIO DE SVS PEREGRINOS I PASAGEROS HICO AQVÍ ESTA FVENTE EL D. D. PEDRO DE VALDÉS, FEIJO I NOBOA CNO LECTORAL PROVINCIANO GNL DE SANTIAGO”.

Canda os rapaces ían TOPO, NIMO e NIMIA, as nosas mascotas, vestidas para a ocasión de peregrinos.

Na andaina atoparon, en segundo termo, o albergue de peregrinos e co Camiño por diante foron realizando distintas probas que se complementaron coa lectura de poemas d' *O Camiño do A ao Z* de Ana M.^a Fernández e Xoán Babarro.

Comezaron con "Camiño" e "Xacobeo" nada máis chegar, aos que seguiron os poemas "Dragón" á beira da fonte, "Bordón" cando tocou explicar a indumentaria do peregrino, "Vieira" e "Km" ao emprender a marcha e, xa en ruta, "Compañía", "Lonxe", "Universo" e "Camiños".

Á volta, na aula, agardábanos os cuestionarios e os crebacabezas pero aínda deu tempo antes a repoñer forzas cunha boa merenda e a descansar un chisco.

Xulia Marqués

Coordinadora do EDLG e de **Vedra medra**